

Հավելված №2

Հայաստանի Հանրապետության հանրային
ծառայությունները կարգավորող հանձնաժողովի 2022
թվականի նոյեմբերի 29-ի №520-Ն որոշման

ԷԼԵԿՏՐԱԷՆԵՐԳԵՏԻԿԱԿԱՆ ՀԱՄԱԿԱՐԳՈՒՄ ՍԱԿԱԳՆԵՐԻ ՍԱՀՄԱՆՄԱՆ ՈՒ ՎԵՐԱՆԱՅՄԱՆ ԿԱՐԳ

1. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգը սահմանում է էլեկտրաէներգետիկական համակարգում սակագնային կարգավորման ենթակա լիցենզավորված գործունեություն իրականացնող անձանց (այսուհետ՝ Լիցենզավորված անձ) Սակագների սահմանման ու վերանայման գործընթացը:
2. Սույն կարգում օգտագործված հիմնական հասկացություններն են՝
 - 1) **Արտադրող՝** էլեկտրական էներգիայի (հզորության) արտադրության իրավունք ունեցող և փաստացի արտադրող անձ, բացառությամբ կարգաբերման-գործարկման աշխատանքների ընթացքում գտնվող կայանի:
 - 2) **Երաշխավորված մատակարար՝** էլեկտրական էներգիայի երաշխավորված մատակարարի լիցենզիա ունեցող անձ:
 - 3) **ԿԷԱ կայան՝** 30 ՄՎտ և ավելի տեղակայված հզորություն ունեցող՝ էլեկտրաէներգետիկական մեծածախ շուկայի առևտրային կանոնների համաձայն սակագնային կարգավորման ենթակա Արտադրող, բացառությամբ ՊԷԱ կայանի, ՎԷԱ կայանի, ՀԷԱ կայանի և Հաշվեկշռման ծառայություն մատուցող Արտադրողի:
 - 4) **Համակարգային ծառայություններ՝** էլեկտրաէներգետիկական համակարգի հուսալի և անվտանգ աշխատանքի համար էլեկտրաէներգետիկական մեծածախ շուկայի մասնակիցների կողմից ԷՀՑ կանոններով սահմանված դեպքերում և կարգով մատուցվող ծառայություններ:
 - 5) **Հայտ՝** Սակագնի սահմանման կամ վերանայման համար Հանձնաժողով ներկայացվող փաստաթղթերի փաթեթ:
 - 6) **Հայտատու՝** Սակագնի սահմանման կամ վերանայման Հայտ ներկայացնող ֆիզիկական կամ իրավաբանական անձ:
 - 7) **Հանձնաժողով՝** Հայաստանի Հանրապետության հանրային ծառայությունները կարգավորող հանձնաժողով:

- 8) **Հաշվեկշռման ծառայություն՝** էլեկտրաէներգետիկական շուկայի հաղորդման ցանցային կանոններով նախատեսված Համակարգային ծառայության տեսակ.
- 9) **ՀԷԱ կայան՝** Հաշվեկշռման և հաճախականության կարգավորման նպատակով երկրորդային և երրորդային պահուստ ապահովող Արտադրող.
- 10) **ՊԷԱ կայան՝** պետություն-մասնավոր գործընկերության շրջանակում գործող Արտադրող, բացառությամբ ՀԷԱ կայանի.
- 11) **Սակագին՝** էլեկտրական էներգիայի (հզորության) միավորի վաճառքի, էներգետիկայի բնագավառում լիցենզավորված գործունեությամբ մատուցվող ծառայությունների համար Հանձնաժողովի կողմից «էներգետիկայի մասին» օրենքին համապատասխան սահմանված առավելագույն գին կամ վճար.
- 12) **ՎԷԱ կայան՝** «էներգետիկայի մասին» օրենքով սահմանված էլեկտրական էներգիայի գնման երաշխիք ունեցող մինչև 30 ՄՎտ հզորությամբ վերականգնվող էներգետիկ ռեսուրսների կիրառմամբ Արտադրող, բացառությամբ ՊԷԱ կայանի:

3. էլեկտրաէներգետիկական համակարգում սակագնային կարգավորման ենթակա են Հանձնաժողովի կողմից հաստատված էներգետիկայի բնագավառում գործունեության լիցենզավորման կարգի համաձայն լիցենզավորման ենթակա գործունեության հետևյալ տեսակները.

- 1) էլեկտրական էներգիայի (հզորության) արտադրություն՝ ԿԷԱ կայանների, ՎԷԱ կայանների, ՊԷԱ կայանների, ՀԷԱ կայանների և Հաշվեկշռման ծառայություն մատուցող Արտադրողի կողմից,
- 2) էլեկտրաէներգետիկական համակարգի օպերատորի ծառայության մատուցում,
- 3) էլեկտրաէներգետիկական շուկայի օպերատորի ծառայության մատուցում,
- 4) էլեկտրական էներգիայի հաղորդման ծառայության մատուցում,
- 5) Հանձնաժողովի սահմանած դեպքերում էլեկտրաէներգետիկական մեծածախ շուկայի մասնակիցների կողմից Համակարգային ծառայությունների մատուցում,
- 6) էլեկտրական էներգիայի բաշխման ծառայության մատուցում,
- 7) Երաշխավորված մատակարարի կողմից էլեկտրական էներգիայի վաճառք սպառողներին:

4. Հանձնաժողովի կողմից հաստատված Լիցենզավորված անձի լիցենզիայի պայմանների կամ պետություն-մասնավոր գործընկերության շրջանակում կնքված պայմանագրի մաս կազմող սակագնային համաձայնագրում Սակագների սահմանման (վերանայման) այլ մոտեցումներ ամրագրված լինելու դեպքում կիրառվում են նշված մոտեցումները:
5. Սահմանված Սակագինը կարող է վերանայվել ինչպես Լիցենզավորված անձի, այնպես էլ Հանձնաժողովի նախաձեռնությամբ:
6. Սակագների գործողության ժամկետը 6 ամսից պակաս չի կարող լինել, բացառությամբ «Էներգետիկայի մասին» օրենքով նախատեսված դեպքերի:
7. Հայտատուն օրենքներով սահմանված կարգով պատասխանատվություն է կրում Հանձնաժողով ներկայացրած տեղեկատվության հավաստիության համար:
8. Հայտատուի կողմից Հանձնաժողով ներկայացվող բոլոր փաստաթղթերը պետք է վավերացված լինեն տվյալ Լիցենզավորված անձի կնիքով (առկայության դեպքում) և լիազորված անձի ստորագրությամբ:

2. ՍԱԿԱԳՆԵՐԻ ՍԱՀՄԱՆՄԱՆ ՌԻ ՎԵՐԱՆԱՅՄԱՆ ՎԵՐԱԲԵՐՅԱԼ ՀԱՅՏԻ ԸՆԴՈՒՆՈՒՄԸ, ՔՆՆԱՐԿՈՒՄԸ ԵՎ ՀԱՄԱՊԱՏԱՍԽԱՆ ՈՐՈՇՄԱՆ ԿԱՅԱՑՈՒՄԸ

9. Սակագների սահմանման կամ վերանայման համար Հայտատուն համապատասխան հաշվարկներով և հիմնավորումներով Հայտ է ներկայացնում Հանձնաժողով՝ երկու օրինակից (փոքր հիդրոէլեկտրակայանների և էներգիայի վերականգնվող այլ աղբյուրների կիրառմամբ գործող կայանների դեպքում՝ մեկ օրինակից)՝ համաձայն սույն կարգի N¹ հավելվածով սահմանված փաստաթղթերի ցանկի: Հայտատուն Հայտը Հանձնաժողով մուտքագրում է սույն կարգի N³ հավելվածով սահմանված ձևով հայտարարությունը հրապարակելուց ոչ ուշ, քան 20 աշխատանքային օր հետո: Հայտատուն սույն կարգի N³ հավելվածով սահմանված ձևով կազմված հայտարարությունը տեղադրում է նաև Հայաստանի Հանրապետության հրապարակային ծանուցումների պաշտոնական ինտերնետային կայքում (<http://www.azdarar.am/>):
10. Հայտը Հանձնաժողովում մուտքագրվելուց հետո Հանձնաժողովի աշխատակազմը սույն կարգի 11-րդ կետում նշված ժամկետում ստուգում է Հայտի ամբողջականությունը, նրանում ընդգրկված փաստաթղթերի ձևակերպման ճշտությունը:
11. Հանձնաժողովը Հայտն ուսումնասիրության ընդունելու կամ չընդունելու մասին գրավոր տեղեկացնում է Հայտատուին՝ Հայտը Հանձնաժողովում մուտքագրվելու օրվանից ոչ ուշ, քան 10 աշխատանքային օրվա ընթացքում:

12. Հայտը չի ընդունվում ուսումնասիրության, եթե՝

- 1) բացակայում է սույն կարգի №1 հավելվածով սահմանված փաստաթղթերից որևէ մեկը, Հայտում ընդգրկված փաստաթղթերը չեն համապատասխանում օրենքներով, այլ իրավական ակտերով և սույն կարգով սահմանված պահանջներին.
- 2) ներկայացված փաստաթղթերում և տեղեկատվություններում առկա են անճշտություններ և անհամապատասխանություններ,
- 3) Հանձնաժողովը չի ընդունել ուսումնասիրության կամ մերժել է Հայտատուի՝ լիցենզիա ստանալու հայտը կամ Սակագնի սահմանման կամ վերանայման համար հիմք հանդիսացող՝ լիցենզիայում փոփոխություններ կատարելու դիմումը:

13. Հայտն ուսումնասիրության չընդունելու դեպքում՝

- 1) այն Հայտատուին չի վերադարձվում և պահպանվում է Հանձնաժողովում,
- 2) Հայտատուն, հայտնաբերված թերությունները վերացնելուց հետո, կարող է նոր Հայտով դիմել Հանձնաժողով, որի դեպքում Հայտատուն իրավունք ունի գրավոր հղում կատարել նախկին Հայտով ներկայացված փաստաթղթերին, եթե դրանցում ներկայացված տվյալները նոր Հայտի ներկայացման պահին չեն փոփոխվել:

14. Սույն կարգի 12-րդ կետում նշված հիմքեր չհայտնաբերելու դեպքում Հայտն ընդունվում է ուսումնասիրության, որի արդյունքներով Հանձնաժողովը Հայտը մերժում է կամ Սակագինը սահմանում, վերանայում (վերահաստատում կամ փոփոխում) և համապատասխան որոշում է կայացնում ուսումնասիրության ընդունված Հայտը Հանձնաժողով ներկայացնելու օրվանից հետո՝ 80 աշխատանքային օրվա ընթացքում (փոքր հիդրոէլեկտրակայանների և էներգիայի վերականգնվող այլ աղբյուրների կիրառմամբ գործող կայանների դեպքում՝ 25 աշխատանքային օրվա ընթացքում):

15. Հայտի ուսումնասիրության ընթացքում Հայտատուն կարող է դիմել Հանձնաժողով՝ Հայտի ուսումնասիրությունը դադարեցնելու համար: Այս դեպքում Հայտատուն կարող է նոր Հայտով կրկին դիմել Հանձնաժողով՝ անհրաժեշտության դեպքում հղում կատարելով նախկին Հայտով ներկայացված փաստաթղթերին, եթե դրանցում նոր Հայտի ներկայացման պահին փոփոխություններ տեղի չեն ունեցել:

16. Հանձնաժողովը Հայտը մերժում է, եթե Սակագնի սահմանման վերաբերյալ առաջին անգամ Հայտ ներկայացնող անձի լիցենզիա ստանալու հայտը կամ Սակագնի սահմանման կամ վերանայման համար հիմք հանդիսացող՝ լիցենզիայում փոփոխություններ կատարելու դիմումը չի ընդունվել ուսումնասիրության կամ մերժվել է:

17. Սակագների սահմանման կամ վերանայման (դրանց մերժման) վերաբերյալ Հանձնաժողովի որոշման պատճենը սահմանված կարգով ուղարկվում է Հայտատուին:
18. Սպառողների համար Սակագների սահմանման կամ վերանայման դեպքում՝
- 1) Հայտն ուսումնասիրության ընդունելու մասին Երաշխավորված մատակարարին տեղեկացնելու օրվանից հետո 5 աշխատանքային օրվա ընթացքում Հայտը տեղադրվում է Հանձնաժողովի ինտերնետային կայքում՝ հնարավորություն ընձեռելով սպառողների շահերը պաշտպանող կազմակերպություններին և շահագրգիռ այլ կողմերին ծանոթանալու, ներկայացնելու իրենց առաջարկները և ստանալու պարզաբանումներ, որի ապահովման նպատակով Հանձնաժողովի ինտերնետային կայքում հրապարակվում է նաև համապատասխան ստորաբաժանման հեռախոսահամարը և էլեկտրոնային փոստի հասցեն,
 - 2) Երաշխավորված մատակարարը Հայտը Հանձնաժողովի ինտերնետային կայքում հրապարակվելուց հետո 10 աշխատանքային օրվա ընթացքում հրավիրում է քննարկում՝ բոլոր շահագրգիռ կողմերին ներկայացնելու սպառողների Սակագների վերանայմանը հանգեցնող գործոնները և իր պարզաբանումները: Քննարկման տեղի և ժամի մասին Երաշխավորված մատակարարը իրազեկում է առնվազն 3 աշխատանքային օր առաջ,
 - 3) Սակագների սահմանման (վերանայման) մասին որոշման նախագիծը Հանձնաժողովի նիստում քննարկելուց՝
 - ա. առնվազն 6 աշխատանքային օր առաջ Սակագների վերաբերյալ Հանձնաժողովի աշխատակազմի հաշվարկները՝ Հայտով ներկայացված հաշվարկների հետ համեմատականով, տեղադրվում են Հանձնաժողովի ինտերնետային կայքում՝ հնարավորություն ընձեռելով սպառողների շահերը պաշտպանող կազմակերպություններին և շահագրգիռ այլ կողմերին ծանոթանալու, ներկայացնելու իրենց առաջարկությունները և ստանալու պարզաբանումներ,
 - բ. առնվազն 1 աշխատանքային օր առաջ սպառողների շահերը պաշտպանող կազմակերպությունների և Երաշխավորված մատակարարի ներկայացուցիչների մասնակցությամբ Հանձնաժողովում կազմակերպվում է քննարկում, որի տեղի և ժամի մասին Հանձնաժողովը իր ինտերնետային կայքում տեղադրում է համապատասխան հայտարարություն առնվազն 3 աշխատանքային օր առաջ:

3. ՀԱՆՁՆԱԺՈՂՈՎԻ ՆԱԽԱՁԵՌՆՈՒԹՅԱՄԲ ՍԱԿԱԳՆԵՐԻ ՎԵՐԱՆԱՅՈՒՄԸ

19. Հանձնաժողովը սեփական նախաձեռնությամբ սույն կարգի համաձայն կարող է վերանայել գործող Սակագինը և սահմանել նոր Սակագին՝ ելնելով Լիցենզավորված անձի տնտեսական գործունեության արդյունքներից, Ներդրումային ծրագրերի և սպառողներին մատուցվող ծառայությունների որակի նկատմամբ ներկայացված պահանջների կատարումից, ինչպես նաև «Էներգետիկայի մասին» օրենքով նախատեսված դեպքերում:
20. Հանձնաժողովն իր նախաձեռնությամբ Սակագների վերանայման գործընթաց ձեռնարկելու դեպքում՝
- 1) այդ մասին գրավոր տեղեկացնում է Լիցենզավորված անձին, բացառությամբ ՎԷԱ կայանների.
 - 2) Լիցենզավորված անձից կարող է պահանջել լիցենզավորված գործունեությանն առնչվող՝ Սակագնի տարր կազմող ցուցանիշների վերաբերյալ անհրաժեշտ տեղեկատվություն:
21. Հանձնաժողովն իր նախաձեռնությամբ սպառողների համար Սակագների սահմանման կամ վերանայման գործընթաց ձեռնարկելու դեպքում՝
- 1) սույն կարգի 20-րդ կետի 1-ին ենթակետով նախատեսված գրավոր տեղեկացումից հետո 5 աշխատանքային օրվա ընթացքում իր ինտերնետային կայքում հրապարակում է հաղորդագրություն Սակագների վերանայման գործընթաց սկսելու վերաբերյալ՝ նշելով նաև Սակագների վերանայման գործընթաց սկսելու հանգամանքները.
 - 2) սույն կարգի 18-րդ կետի 3-րդ ենթակետով սահմանված ընթացակարգին համապատասխան իրականացնում է քննարկում:
22. Հանձնաժողովն իր նախաձեռնությամբ Սակագինը վերանայում է Լիցենզավորված անձին այդ մասին գրավոր տեղեկացնելու օրվանից հետո 80 աշխատանքային օրվա ընթացքում՝ բացառությամբ ՎԷԱ կայանների: